

NAQQIUT

Siunnersuut 9. august 2018-imeersoq taarserpaa

Tungavilersuut

Inatsisissatut siunnersuummi 9. august 2018-imi nassiunneqaqqaartumi siunnersuutip qulequtaa aammalu siunnersuummi § 1-ip kalaallisuuani aammalu siunnersuutip danskisuuani imminnut naapertuutinnigitsut paasineqarpoq.

Siunnersuutip qulequtaa kiisalu siunnersuummi § 1 kalaallisuuani danskisuuani imminnut naapertuuttunngortillugit iluarsineqarput.

Siunnersuummut nassuiaatit

Nalinginnaasumik nassuiaatit

1. Aallarniut

Kalaallit Nunaanni aalisarnermi tamarmi isumalluutininik atuinnermut akitsuuseeriaaseq nutaaq 2017-imi ukiakkut saqqummiunneqarpoq. Isumalluutininik atuinnermut akitsuutininik inuiaqatigiit unneqqarissumik peqataassuteqarnissaata qulakkeerneqarnissaa, tamatumalu peqatigisaanik periutsumik ersarinnerusumik pisariinnerusumillu atuutsitsilernissaq siunnersuummi siunertarineqarpoq.

Siunissami aalisarnerup pisariinnerpaamik aaqqissuunnissaanut piunassuseqalersitsinikkut imarsiornerup immi akilersinnaassusiata qaffassarneqarnissaanut, taamaalillunilu isumalluutininik naapertuunnerpaamik atorluanaassamut akitsuusersueriaatsip nutaap peqataaqataaannissaa naatsorsuutigineqarpoq, tamannalu aalisarnermik ingerlatsisunut inuiaqatigiinnullu iluaqutaassalluni.

Akitsuuseeriaatsilli ulloq 1. januar 2018-imi atuutilersup atuutsinneqalernerata kingorna Naalakkersuisunit paasineqarpoq akitsuuseeriaasissatut akuersissutigineqartoq aalisagaqatigiit ilaat eqqarsaatigalugit naliusunik aalisakkallu atorluarneqarsinnaassusianik apparitseratarsinnaasoq, tamannalu Inatsisartut inatsisaanni siunertaanngilaq.

Ullumikkut akiitsumut tungavigineqarpoq kiilumut ataatsimut tunisinermi akiviusoq pisisup tunisisullu akornanni isumaqatigiissutigineqartoq, tassunga ilanngullugit tapiusinnaasut il.il. aammalu pisat tunineqarneranni tulaanneqarneranniluunniit tunisinermut, assartuinnermut il.il.

aningaasartuutit ilanngaatineqarneq ajorlutik. Periutsimi maanna atuuttumi niuerfinni pisiumassuseq angallammiluunniit tunisassiornissamut periarfissat eqqumaffiginiarneqanngillat.

Akitsuuseeriaatsip maanna ilusilerneqarneratigut aalisagaqatigiit ilaannut tunngavissaqarluaraannilu aalisakkanik ilivitsunik pisussanut nunanit allaneersunut tunisinissaq aammalu aalisakkap Kalaallit Nunaata avataani suliareqqaarneqarnissaa imminut akilersinnaanerusoq orniginartinneqarnerusinnaalluni. Tamatumunnga pissutaavoq aalisakkat sulareriikkat tunineranni akiusoq qaffasinnerummat. Tunisinermi akiusoq qaffasinneruppat akitsuutip annertussusia qaffasinnerussaaq. Aalisakkat ilivitsut nunanut allanut tuninerisigut avammut tunisiortortut akitsuutit annertussusiat apparsimaartissinnaavaat, tamannalu avammut tunisisartunut iluanaarutaasinnaavoq Nunattalu Karsianut akornutaasinnaalluni.

Assersuutigalugu aalisarnermik ingerlatsisut imaani saaniiakkat taamaallaallu aalisakkanik ilivitsunik sularineqanngitsunik tunisassiorunnaarpata tamanna akitsuutip procentianut ammut sunniuteqassaaq. Periuseq taama allangortinneqarpat akitsuutinit iluanaarutissatut naatsorsuutigineqartut assigisaanik annikilleriaateqassasut naatsorsuutigineqarpoq. Tamatuma kingunerisinnaavaa akitsuutit aqqissugaanerata nassatarisaanik inuussutissarsiummik ingerlataqartut Kalaallit Nunaata avataani suliareqqitsittassammatigit imaluunniit nioqutissiamik niuerfinnit piumaneqartumik nioqutissiorunnaassammata, tamannalu aalisarnermik inuussutissarsiornermut inuiaqatigiinnuunniit tulluanngilaq.

Nioqutissianut suliareqqitanut kaaviiartitat aalisakkamut ilivitsumut naatsorsorneqartalersillugit periuseq allangortinneqarpat aalisakkap nalivia pissarsiarineqarsinnaassaaq, tamannalu akitsuutip procentiata aalajangersarneqarnerani aamma takuneqarsinnaassalluni.

2. Siunnersuummi immikkoortut pingaernerit

Periutsimi akitsuutinit tunngavigineqartoq siunnersuutikkut allangortinneqassaaq.

Siusinnerusukkut tunineqartut annertussusiat (tunisassiaq piariigaq) pinnagu aalisarneqartut ('aalisagaq ilivitsuutillugu') tunineqarneranni akiusoq tunngavigalugu akitsuuteqartitsilluni periutsip allangortinneqarneratigut tunisinermi agguaqatigiissillugu akiusoq appasinnerusoq anguneqassaaq, taamaalillunilu akitsuutip procentia appasinnerussalluni. Taamaattorli akitsuutit procentiat appasinnerusoq aalisagaqatigiinnik ukuninnga avammut tunisaqarnermut sunniuteqassasoq naatsorsuutigineqarpoq; saarulliit, suluppaakkat, kullerit saarulliusaallu, akerlianillu akitsuutit procentiata raajanut qaleralinnullu annertunerusumik sunniuteqarnissaa naatsorsuutigineqarnani.

Aammattaaq saattuanut uiluinnullu akitsuutip noorlumut (0) inissinnissaa siunnersuutigineqarpoq. Tamatumunnga tunngavigineqartoq tassaavoq avataani saattuanik maannakkut aalisartoqanngimmat aammalu aalisarnermut killilimmik ingerlanneqartumut maannakkut akitsuusiinissaq naapertuuttutut isigineqanngimmat. Uiluinnillu akitsuusiinissamat atatillugu inuussutissarsiuteqarnermik ingerlatsivimmit paasissutissat kingulliit aammalu uiluinniarnermi ingerlanneqartumit akilersinnaassutsimik naatsorsuinerit kingulliit takutippaat uiluinniarnermi annertugisassaannigsumik sinneqartoofiusartut, assersuutigalugulu imminut akilersinnaassutsikkut periarfissiineq ajorluni soorlu nutaanik angallatisinissanut assigisaanullu. Pisuussutinik iluaquteqarnermi akitsuut nalinginnaasumit annertunerusumik sinneqartoornermi akitsuutaavoq. Uiluinniarnermi tamanna atuutinngilaq. Akitsuusiinerullu atuutiinnarnissaa siunertamat naapertuussorinangilaq.

Aammattaaq pisat tunitsivimmi suliarineqartussanngorlugit tunisineq pillugu inatsisartut inatsisaanni aalajangersakkat malillugit taamaallaat akitsuuteqartitsisoqartarnissaa inatsisip oqaasertaani erseqqissaatigineqassasoq siunnersuutigineqarpoq. Kalaallit Nunaanni tunitsivimmut tunisassiorfimmulluunniit tulaassinermi pisat tunineqarnermik kingorna suliareqqaarneqaratik avammut allamut tunineqarpata imaluunniit Kalaallit Nunaata avataanut tunisineq pillugu inatsisartut inatsisaanni aalajangersakkat naapertorlugit akitsuusiisoqassaaq.

Aammattaaq akitsuutit naatsorsorneqarnissaanni tunisinermi agguaqatigiissillugu akiusut pillugit paasissutissat Nunatsinni Naatsorsueqqissaartarfimmit qaammatit tamaasa tunisinermit akiusunik tamanut saqqummiussisartumit pissarsiarineqartassasut inatsisip oqaasertaani erseqqissaatigineqarpoq. Nunatsinni Naatsorsueqqissaartarfik paasissutissanik Kalaallit Nunaanni Aalisarsinnaanermut Akuersissutinik Nakkutilliisoqarfimmit (KANUAANA) tunitsivinnit paasissutissanik pissarsisartumit paasissutissanik pissarsisarpoq. Nunatsinni Naatsorsueqqissaartarfimmit paasissutissanik pissarsiniartarnissami siunnerfigineqarpoq paasissutissat atorineqartut pisisartunit takuneqarsinnaanissaat, pisisartut tamarmik kisitsisitigut paasissutissaasivimmi akit takusinnaassammatigit.

Tamatuma saniatigut unerartitsisussaataitasup nalunaarutiginninnermini uppersaaitit assilinerinik nalunaarutigisaqarnermini ilanngussaqartussaataitanera pillugu aalajangersagaq atorunnaassaaq. Allaffissornikkut akitsuutit suliarineqarnerini ataavartumik assilinerisa nassiussorneri pisariaqanngitsoq erserpoq. Akileraartarnermik aqutsisoqarfiup paasissutissat suliamut attuumassuteqartut aanissaanut periarfissaqareerpoq, tamatumani sulianut attuumassuteqartut assilineri siuliani taaneqartut akileraaruserinermik ingerlatsineq pillugu Inatsisartut inatsisaanni § 59 ilaatigut najoqqutaralugu tamanna periarfissaareerpoq, Akileraartarnermullu aqutsisoqarfiup nalunaarutiginninnermi uppersaaitit toqqammavigineqartut nakkutiginiarnermi pisariaqarsorisartik najoqqutaralugu misissuisinnaallutik. Taarsiullugu nalunaarsuisussaataitanermut aammalu akitsuutinik akiliteqarnermi minnerpaaffissat qaffasissusissaat ikkunneqassapput. Killiliussassaq aalisakkat suussusaanut ataasiakkaanut 100 kr.-inut aalajangiunneqarnissaa akitsuusersuinermilu piffissarititaasumut ataatsimut atuunnissaa siunnersuutigineqarpoq.

Tamatumunnga tunngaviuvoq akitsuusiinerup allaffissornikkut annikillisaavigineqarnissaa, assersuutigalugu pisarisuukkanut annikinnernut atatillugu nalunaarsuinernut tunngatillugu.

Kiisalu siunnersuutigineqarpoq, sinerissap qanittuani qaleralinniarnerni akitsuutip 5 procentiniit 4 procentimut appartinneqarnissaa, tamatumani angallatit tunisassiortut pisat nalinginik qaffariaataasinnaasunik suliareqqiinernik suliaqarsinnaanerisut annertutigisumik sinerissap qanittuani aalisartut suliaqarsinnaanginneri eqqarsaatigalugit. Akitsuutit qummut killissai siunnersuutigineqarpoq 17,5 %-imiit 17,9 %-inngortinneqarnissaa, tamatumani raajanik qaleralinnillu avammut tunisinerni akitsuutinik sunniuteqarnissaa naatsorsuutigineqarluni.

Inatsisissatut siunnersuutip inatsimmut atuuttumut sanilliunneqarnera	
<i>Oqaasertat atuuttut</i>	<i>Inatsisissatut siunnersuut</i>
	§ 1 Kalaallit Nunaanni aalisarnermi pisarineqartut isumalluutininik atuinnermut akitsuutaat pillugit inatsisartut inatsisaat nr. 46, 23. november 2017-imeersoq naapertorlugu makku allannguutiginitinneqarput:
§ 3, imm. 1. Avataasiorluni raajarniarnermi, qaleralinniarnermi, saarullinniarnermi, saattuarniarnermi, kullererniarnermi, saarulliusaarniarnermi, suluppaagarniarnermi uiluinniarnermilu akitsuutit §§-ini 4-miit 7-imut maleruagassat naapertorlugit akilerneqassapput.	1. § 3, imm. 1 ima oqaasertalerneqassaaq: “ Avataasiorluni raajarniarnermi, qaleralinniarnermi, saarullinniarnermi, kullererniarnermi, saarulliusaarniarnermi aammalu suluppaagarniarnermi akitsuutit §§-ini 4-miit 7-imut maleruagassat naapertorlugit akilerneqassapput.”
§ 4, Imm. 1. Akitsuut tunisinermi, tassa pisat tunineranni tulaanneranniluunniit akiusup procentinngorlugu ilaanit akilerneqassaaq. Tunisinermi aki tassaavoq aki pisisumit tunisisumillu isumaqatigiissutaasoq, tassunga ilanngullugit bonusiujunnartut,	2. § 4, imm. 1, ima oqaasertalerneqassaaq: ”Imm. 1. Akitsuut tunisinermi, tassa pisat kiilumut ataatsimut tunineranni tulaanneranniluunniit akiusup procentinngorlugu ilaanit akilerneqassaaq. Pisisaq suliareqqitaappat aalisakkatut ilivitsutut naatsorsorneqartassaaq. ”Aalisagaq ilivitsaq” paasineqassaaq pisat ilaasa

<p>assartorneqarnerannut tapit il.il., aammalu tuniniaanermi aningaasartuutit, assartuineq il.il. ilanngaatinagit.”</p>	<p>nalunaarutigineqarnerini naatsorsueriaatsit pillugit Namminersorlutik Oqartussat nalunaarutaat naapertorlugu aalisakkap uumanermini oqimaassusiatut naatsorsorneqartoq. Tunisinermi aki tassaavoq aki pisisumit tunisisumillu isumaqatigiissutaasoq, tassunga ilanngullugit bonusiujunnartut, assartorneqarnerannut tapit il.il., aammalu tuniniaanermi aningaasartuutit, assartuineq il.il. ilanngaatinagit.”</p>
	<p>3. § 4, ima imm. 2-p kingorna immikkoortoq nutaaq ilanngunneqassaaq:</p> <p>” Imm. 3. Pizarreqartut suliareqqinneqarnissat siunertaralugu Kalaallit Nunaanni tunitsivimmut tunisassiorfimmulluunniit tulaassinermi tunisinermi akigitat pillugit Nunatsinni Naatsorsueqqissaartarfimmit paasisutissat atorineqassapput.”</p> <p>Tamatuma kingorna <i>imm. 3-4</i> tassaalissapput <i>imm. 4-5</i>.</p>
<p>§ 5. Imm. 2. <i>Imm. 2.</i> Tunitsivimmut tunisassiorfimmulluunniit tulaassinermi akitsuut kiilumut 0 kr. 5 øre-ussaaq, aalisagaqatigiit kvartali tulaassiffiusoq kvartalinik marlunnik sioqqullugu tunineqarneranni agguaqatigiissillugu akiat kiilumut 8 kr.-init minneruppat.</p>	<p>4. § 5, <i>imm 2.</i> ima oqaasertalerneqassaaq:</p> <p>”<i>Imm. 2.</i> Tunitsivimmut tunisassiorfimmulluunniit suliareqqitassanik tulaassinermi akitsuut kiilumut 0 kr. 5 øre-ussaaq, aalisagaqatigiit kvartali tulaassiffiusoq kvartalinik marlunnik sioqqullugu tunineqarneranni agguaqatigiissillugu akiat kiilumut 8 kr.-init.”</p>
<p>§ 6, Imm. 3. <i>Imm. 3.</i> Akitsuutip procentiata 17,5 procent qaangissanngilaa.</p>	<p>5. § 6, <i>imm. 3.</i> ima oqaasertalerneqassaaq;”<i>Imm. 3.</i> Akitsuutip procentiata 17,9 procent qaangissanngilaa.”</p>
<p>§ 6, imm. 4. <i>Imm. 4.</i> Tunisinermi agguaqatigiissillugit akit aamma akitsuutit procentii, kvartalit</p>	<p>6. § 6. <i>Imm. 4,</i> ima oqaasertalerneqassaaq: ”<i>Imm. 4.</i> Akitsuutit procentii kvartalit</p>

<p>akitsuutit atuuffissaat kingusinnerpaamik sapaatip akunneranik ataatsimik sioqqullugit akileraaruseriffiup internetikkut nittartagaatigut tamanut saqqummiunneqartassapput.</p>	<p>akitsuutit atuuffissaat kingusinnerpaamik sapaatip akunneranik ataatsimik sioqqullugit akileraaruseriffiup internetikkut nittartagaatigut tamanut.”</p>
<p>§ 7. Imm. 1.</p> <p><i>Imm. 1.</i> Tunitsivimmut tunisassiorfimmulluunniit tulaassinermi akitsuut akiusup 5 procenterissavaa, aalisagaqatigiit kvartali tulaassiffiusoq kvartalinik marlunnik sioqqullugu tunineqarneranni agguaqatigiissillugu akiat kiilumut 8 kr.-iuppat angineruppalluunniit.</p>	<p>7. § 7, imm. 1 ima oqaasertalerneqassaaq:</p> <p>”§ 7, imm. 1. Pisarineqartut suliareqqinneqarnissaat siunertaralugu Kalaallit Nunaanni tunitsivimmut tunisassiorfimmulluunniit tulaassinermi aalajangersimasumik akitsuut akiusup 5 procenterissavaa, aalisagaqatigiit kvartali tulaassiffiusoq kvartalinik marlunnik sioqqullugu tunineqarneranni agguaqatigiissillugu akiat kiilumut 8 kr.-iuppat angineruppalluunniit.”</p>
<p>§ 7, imm. 4.</p> <p><i>Imm. 4.</i> Uiluinnik inummut allamut tunniussinermi imaluunniit Kalaallit Nunaanni annissinermi akitsuut akiusup 5 procenterissavaa.</p>	<p>8. § 7, imm. 4-mi ima oqaasertalerneqassaaq:</p> <p>”<i>Imm. 4.</i> Qalerallit tunisassiorfimmut tulaanneqarneranni, sinerissap qanittuani aalisarneqarsimasut, akitsuut akiusup 4 procenterissavaa.”</p>
<p>§ 11, imm. 1.</p> <p><i>Imm. 1.</i> Tunitsivimmut tunisassiorfimmulluunniit tulaassisoqartillugu, tulaassinermut atatillugu akiliutissanik tunniussisussap akitsuut akiliutissanit unerartissavaa. Unerartitsineq pissaaq unerartitsisussaasup aningaasanik unerartinneqartussanik naatsorsuineratigut, aningaasanillu taakkuninnga akiliutissanit ilanngaatiginninneratigut.</p>	<p>9. § 11, imm. 1, ima oqaasertalerneqassaaq:</p> <p>”Kalaallit Nunaanni tunitsivimmut tunisassiorfimmulluunniit suliareqqitassanik tulaassisoqartillugu tulaassinermut atatillugu akiliutissanik tunniussisussap akitsuut akiliutissanit unerartissavaa. Unerartitsineq pissaaq unerartitsisussaasup aningaasanik unerartinneqartussanik naatsorsuineratigut, aningaasanillu taakkuninnga akiliutissanit ilanngaatiginninneratigut.”</p>
<p>§ 12, imm. 2.</p> <p><i>Imm. 2.</i> Nalunaarummut ilanngullugit nassiunneqassapput uppersaatit il.il. nalunaarummut tunngavigineqartut assilineqarneri.</p>	<p>10. § 12, imm 2, ima oqaasertalerneqassaaq:</p> <p>”<i>Imm. 2.</i> Piffissami akitsuuteqarfiusumi akitsuutit akilerneqartut aalisagaqatigiinnut ataatsinut nalunaarsorneqartut 100 kr.-init</p>

	ikinneruppata akitsuutinik taakkuninngalu akilikkanut nalunaarsuutit piumasaaqatigineqassanngillat.”
<p>§ 13, imm. 3. <i>Imm. 3.</i> Nalunaarummut ilanngullugit nassiunneqassapput uppersaatit il.il. nalunaarummut tunngavigineqartut assilineqarneri.</p>	<p>11. § 13, imm. 3, ima oqaasertalerneqassaaq: ”<i>Imm. 3.</i> Piffissami akitsuuteqarfiusumi akitsuutit akilerneqartut aalisagaqatigiinnut ataatsinut nalunaarsorneqartut 100 kr.-init ikinneruppata akitsuutinik taakkuninngalu akilikkanut nalunaarsuutit piumasaaqatigineqassanngillat.”</p>
<p>§ 17, imm. 1. <i>Imm. 1.</i> Piaaraluneerluni mianersuaalliorujussuarluniluunniit § 1, imm. 1-imik, § 11, imm. 2-mik, § 12, imm. 1-imik imm. 2-milluunniit, § 13, imm. 1-imik imm. 2-milluunniit unioqqutitsineq, imaluunniit sivikinnerusumik piffissaqarluni akiliinissamik § 14 naapertorlugu peqquneqarsimanermik qularnaveeqqusiinissamilluunniit peqquneqarsimanermik malinninnginneq Kalaallit Nunaanni Pinerluttulerinermik inatsimmi maleruagassat naapertorlugit pineqaatissiissutigineqarsinnaavoq.</p>	<p>12. § 17, imm. 1, ima oqaasertalerneqassaaq. ”<i>Imm. 1.</i> Piaaraluneerluni mianersuaalliorujussuarluniluunniit § 1, imm. 1-imik, § 11, imm. 2-mik, § 12, imm. 1-imik, § 13, imm. 1-imik imm. 2-milluunniit unioqqutitsineq imaluunniit sivikinnerusumik piffissaqarluni akiliinissamik § 14 naapertorlugu peqquneqarsimanermik qularnaveeqqusiinissamilluunniit peqquneqarsimanermik malinninnginneq Kalaallit Nunaanni Pinerluttulerinermik inatsimmi maleruagassat naapertorlugit pineqaatissiissutigineqarsinnaavoq.”</p>
	<p style="text-align: center;">§ 2</p> <p>Inatsisartut inatsisaat una ulloq 1. januar 2019-imi atuutilersussatut aammalu aalisakkanut ulloq 1. januar 2019-imi kingusinnerusukkulluunniit pisarineqartunut atuutissaaq. <i>Imm. 2.</i> 2019-imi kvartalimut siullermut aappaannullu akitsuutit procentii 2018-imi kvartalit pingajuanni sisamaannilu agguaqatigiissillugu akiusut pillugit paasissutissat tunngavigalugit aalajangersarneqassapput.”</p>

3. Pisortanut aningaasaqarnikkut allaffissornikkullu kingunerisassat

Avataani saarullinniarnemit, kullererniarnemit, saarulliusaarniarnemit suluppaagarniarnemillu akitsuutinit tamarmiusunit 11, 8 mio. kr.-inik iluanaaruteqarnissaq 2018-imi aningaasanut inatsimmi missingersuusiorneqarpoq. Taamaattorli saarulliit, kullerit, saarulliusaat suluppaakkallu akii kingusinnerpaat malillugit 2019-imi akitsuutinit iluanaarutaasussat tamarmiusut 23 mio. kr.-iunissaat naatsorsuutigineqarpoq.

Akitsuutinit tamarmiusunit iluanaarutit 2019-imi missingersuutinit sanilliullugu 11 mio. kr.-it missaanik ikileriassasut naatsorsuutigineqarpoq, taakku 7 mio. kr.-it missaannik iluanaarutinit appariaateqarnermut naapertuullutik. Aalisarnermi akitsuutit appariarnerat inummut ingerlatseqatigiiffinnullu akileraarutit qaffariarnerannik nassataqassaaq, taamaattumillu ilanngaaseereerluni iluanaaruteqarnissaq naatsorsuutigineqarluni. Appariaateqarnerit taaneqartut saarullinnut akitsuutinit appariaateqartoqarneranit annerusumik tunngaveqarnerupput.

Allannguinerup kingorna akitsuutinit tamarmiusunit iluanaarutit 2019-imi iluanaarutissanut missingersuutit naapertorlugit inissisimanissaat taamaasilluni naatsorsuutigineqarpoq.

Maanna periuseq attatiinnarneqarpat aalisarnermik inuussutissarsiutillit suliareqqiisarnermik periusii ima allanngussangatinneqarput aalisakkat avammut tunineqarnissamut qeritinneqartarnissaat annertunerusumik atorneqartussat naatsorsuutigineqarluni. Taama iliuuseqarnikkut agguaqatigiissillugu akiusut annikilleriassapput, tamannalu akitsuutip procentianut aamma appariaataassalluni, akitsuutinillu tamarmiusunit iluanaarutit ilanngullugit appariaateqarfigineqassapput. Periusersartakkanik allanquinissanik aarlerinaateqartoqarsinnaanera siunnersuutikkut annikillissinneqassaaq, Kalaallit Nunaannilu aalisakkat suliareqqaartarneqarnissaannik ikorfartueqataassaaq.

Sinerissamut qanittumi qaleralinniarnemit akitsuutinit isertitat 2019-imi missingersuutit 13, 1 mio. kr.-iupput. Akitsuutinit procenti 5 pct.-imit 4 pct.-imut appariaateqartinneqarpat akitsuutinit isertitat missingerlugu 2,6 mio. –kr.-inik annikilleriaateqassaaq. Ilanngaattissat ilanngaatigereerlugit missingerlugu tamanna 1, 6 mio. kr.-iuvoq.

Uiluinniarnermi akitsuutip peerneqarneratigut 2019-imi naatsorsuutigineqarpoq akitsuutinit tamarmiusunit iluanaarutit 2019-imi 0,5 mio kr.-inik annikilleriaateqarfiussasoq ilanngaattissat ilanngaatigereerlugit missingerlugu 0,33 mio. kr.-it.

Saattussanut akitsuummik atorunnaarsitsineq iluanaarutitigut sunniuteqanngilaq.

Isumalluutininik atuinnermut akitsuutit pillugit Inatsisartut inatsisaata ukiakkut 2018-imi oqaluuserineqarluni suliarineqarnerani piffissaq kingullerpiaq atorlugu allannguutissanik suliaqartoqarpoq, tamatumani saattuarniarnerit, nipisanniarnerit aammalu saarullinniarnerit akitsuuteqartinneqannginnissaat allannguutaalluni. Saattuarniarnerni nipisanniarnernilu akitsuutinit isertitat missingersorneqartut kukkuluttortoqarneratigut peerneqanngitsoorput, aaqqiissuteqarnerlu kisimi peqqutaalluni iluanaarutini appariaateqarneq 3,1 mio. kr.-iusoq teknikkikkut taamaallaat appariarneruvoq. Taamatuttaaq inatsisissatut siunnersuutip oqaluuserineqarluni suliarineqarneranut atatillugu uiluinniarnermi akitsuut appariartinneqarpoq. 2018-imut Aningaasanut Inatsimmi taamaasilluni tamanna 1,8 mio. kr.-inut missingersorneqarpoq 0,5 mio. kr.-inut missingersorneqarani. Taamaammat tamatuma nassatarisaanik 1,3 mio. kr.-inik iluanaarutissani appariaateqarneq missingersuutininik teknikkikkut tamakkiisumik aaqqiissuteqarnerinnaapput.

Akitsuutit qummut killissaanik 17,5 pct.-imiit 17,9 pct.-imut qaffariaateqarneq raajanik qaleralinnillu avammut tunisinerni taamaallaat akitsuutininut sunniuteqassaaq. Tamatumani naatsorsuutigineqarpoq missingerlugu 8 mio. kr.-inik akitsuutininik iluanaaruteqarnerunissaq ukioq 2019-imi, ilanngaattissat ilanngaatigereerlugit missingerlugu 5, 2 mio. kr.-iulluni.

Siunnersuut pisortanut allaffissornikkut annertunerusumik sunniuteqassanngitsoq naatsorsuutigineqarpoq.

4. Inuussutissarsiummik ingerlataqartunut aningaasaqarnikkut allaffissornikkullu kingunerisassat

Siunnersuut saarullinniarnermi, kullererniarnermut, saarulliusaarniarnermi suluppaagarniarnermilu akitsuutininut aningaasartuutit 11 mio. kr.-it missaannik annikilleriarnerannik nassaqaassasoq naatsorsuutigineqarpoq. Isumalluutininik atuinnermut akitsuutit aalisariutini akissarsiat pisat malillugit naatsorsuiffiusartunit ilanngaatigineqartassapput. Taamaattumillu akitsuutit appartinneqarnerat inuttat akissarsiaannik 3 mio. kr.-it missaannik pitsanngoriaataassaaq. Taamaalillunilu akitsuutit appartinneqarnerat akileraarutit A-t aammalu ingerlatseqatigiiffinnit akileraarutinit iluanaarutininut iluaqutaassaaq.

Taamaalilluni akitsuutininik iluanaarutit ataatsimut isigalugu 11 mio. kr.-inik appariaat akileraarutininik tamakkiisunit iluanaarutinit ilanngaaseereerluni 4 mio. kr.-it missiliorlugit appariaateqartoqarneranik inerneqassaaq.

Sunniutissatulli naatsorsuutigineqartut aalisarnermi pissutsit allannguuteqarsinnaanerannit sunniuteqarsinnaalluarpud. Siunnersuut pisat imaani suliareqqinnissaannik aalisarnermik inuussutissarsiuteqartut kajumissuseqarnerulernerannik nassataqassasoq naatsorsuutigineqarpoq.

Sinerissap qanittuani qaleralinniarnermi akitsuutip 1 pct.-imik appariartinneratigut sinerissap qanittuani aalisarnerup akilersinnaassusiata pitsanngoriaateqarfiunissaanik kinguneqarnissaa naatsorsuutigineqarpoq missingerlugu 2, 6 mio. kr.-inik. Akitsuutip appariartinneqarnera akileraarutit A-t akileraarutaasunut sunniuteqassaaq ingerlatseqatigiiffillu akileraarutaannik pitsaasumik sunniuteqassaaq missingerlugu 1 mio. Kr.-inik.

Uiluut akitsuutaarunneqarnerisa peerneqarnerisigut taaneqartumi aalisarnerup missingerlugu 0,5 mio. kr.-inik sinneqartoornulernissaa naatsorsuutigineqarpoq. Ingerlatseqatigiiffiit akileraarutaannit iluanaarnerunissat naatsorsuutigineqarput missingerlugu 0, 16 mio. kr.-inik.

Akileraarutit qummut killissaata 17, 9 pct.-imut qaffariartinneqarnerata kingunerisaanik raajarniarnernit qaleralinniarnelillu avammut tunisinernit missingerlugu 8 mio. kr.-inik akitsuutit qaffariaateqarnissaat naatsorsuutigineqarpoq. Akitsuutit qaffariaateqarnerisa kingunerisaanik inuttarisat akissarsiaat missingerlugu 2,2 mio. kr.-inik appariaateqarnissaa naatsorsuutigineqarpoq, aammalu akileraarutit A-t akileraarutaasut kiisalu ingerlatseqatigiiffinit akileraarutit missingerlugu 2, 8 mio. kr.-inik appariaateqarnissaat naatsorsuutigineqarpoq. Raajanik qaleralinnillu aalisarnermi akit qaffasissut tunngavigalugit taaneqartumi aalisarnermi akitsuutit qummut killissaata qaffariaateqartinneqarnerisa kingorna aalisarneq sulit akilersinnaassasoq naatsorsuutigineqarpoq.

Siunnersuut aalisarnermik inuussutissarsiuteqartunut allaffissornikkut annertunerusumik kinguneqassanngitsoq naatsorsuutigineqarpoq.

5. Avatangiisinut, pinngortitamut innuttaasullu peqqissuunissaannut kingunerisassat
Siunnersuut avatangiisinut pinngortitamullu annertunerusumik kinguneqarnissaa naatsorsuutigineqanngilaq.

Aamma siunnersuut innuttaasut peqqissuunissaannut kinguneqassanngitsoq naatsorsuutigineqarpoq.

6. Innuttaasunut kingunerisassat

Saarullinnit, kullerinit, saarulliusaanit suluppaakkanillu pisarineqartunut akitsuutinit iluanaarutissatut ilimagineqartut 11 mio. kr.-inik annikinnerunissaannik ilimagineqartut, aalisariutini inuttaasut akissarsiassaasa tamarmiusut 3 mio. kr.-it missaannik qaffasinnerunissaannik kinguneqassasoq naatsorsuutigineqarpoq.

Sinerissap qanittuani qaleralinnik akitsuutip missingerlugu 2,6 mio. kr.-inik appartinneqarnerata kingorna aalisariutini akissarsiat missingerlugu 1-1,6 mio. kr.-it akornani qaffariaateqarfiunissaat naatsorsuutigineqarpoq. Tamatumani sinerissap qanittuani

qaleralinniarnerni aalisartut amerlanerit namminersortutut aalisartuuneri tungavigalugu. Appariaateqarnissarlu aalisartut ataasiakkaat akornani aningaasaatit atorsinnaasat pisiniarsinnaassuserlu pitsaasumik sunniuteqarfigissagaa naatsorsuutigineqarpoq.

Illuatungaani akitsuutit qummut killissaata 17,5 pct.-imit 17,9 pct.-imut qaffariaateqartinneqarnerata kingunerisaanik raajarniutini tunisassiorfiusuni akissarsiat inissisimanerisa appariaateqarfiunissaa naatsorsuutigineqarpoq, kiisalu avataasiorluni qaleralinniarnerni ilanngullugu katillugit missingerlugu 2,2 mio. kr.-it.

Siunnersuut allaffissornikkut innuttaasunut kinguneqassanngitsoq naatsorsuutigineqarpoq.

7. Kingunerisassat allat annertuut

Siunnersuut annertuunik allanik kinguneqartussatut naatsorsuutigineqanngilaq.

8. Oqartussanut suliniaqatigiiffinnullu il.il. tusarniaaneq

Siunnersuut piffissami 13. juni 2018-imit 10. juli 2018-imut ukununga tusarniaassutigineqarpoq: Sulisitsisut (GE), NUSUKA, SIK, KNAPK, Naalakkersuisut Siulittaasuata Naalakkersuisoqarfia, Pinngortitamut Avatangiisinullu Naalakkersuisoqarfik, Isumaginninnermut Inatsisinillu Atuutsitsinnermut Naalakkersuisoqarfik, Inuussutissarsiornermut Nukissiuuteqarnermullu Naalakkersuisoqarfik, Aalisarnermut, Piniarnermut Nunalerinnermullu Naalakkersuisoqarfik, Aningaasaqarnermut Naalakkersuisoqarfik, Ilinniartitaanermut, Kulturimut Ilageeqarnermullu Naalakkersuisoqarfik, Peqqissutsimut Ilisimatusarnermullu Naalakkersuisoqarfik, Nunanut Allanut Naalakkersuisoqarfik, Ineqarnermut Attaveqatigiinnermullu Naalakkersuisoqarfik, Aatsitassanut Suliffeqarnermut Nunamullu Namminermut Naalakkersuisoqarfik, Kommuneqarfik Sermersooq, Qeqqata Kommunia, Kommune Kujalleq, Avannaata Kommunia, Kommuneqarfik Qeqertalik, Deloitte, Grønlands Revisionskontor, BK Revision, EY Grønland, GrønlandsBanken, BankNordik aamma BDO.

Aammattaq siunnersuut www.naalakkersuisut.gl-imi tusarniaassutini tusarniaaffigineqartunut nassiunneqarnerata nalaani tamanut aamma saqqummiunneqarpoq.

Tusarniaanermut akissuteqarnissamut piffissaliunneqartup naanerani tusarniaanermut akissutit makkunanit tiguneqarput:

Kommuneqarfik Sermersooq, Avannaata Kommunia, Kommune Kujalleq, KNAPK, Sulisitsisut, Isumaginninnermut Inatsisinillu Atuutsitsinnermut Naalakkersuisoqarfik, Peqqissutsimut Ilisimatusarnermullu Naalakkersuisoqarfik, Naalakkersuisut Siulittaasuata Naalakkersuisoqarfia aamma Akileraartarnermut Aqutsisoqarfik.

Ataani tusarniaavigisat oqaaseqaataanni immikkoortut pingaarnertit nalinginnaasumik allannilerlugit uteqqinneqarput, Naalakkersuisut oqaaseqaataat uingasunik allanneqarlutik.

Sulisitsisut

Sulisitsisut (GE) aallaqqaasiutigalugu oqaatigaat, iluarisimaarlugu, inatsisissatut siunnersuummi, 1. januar 2018-imi atuutilersumi aalajangersakkat assigiinngitsut pillugit erseqqissaasoqarmat.

GE-lli naammaginarsorinngilaa, inatsisissatut siunnersuummut aningaasaliinissaq avataasiorluni raajarniarnermut qaleralinniarnermullu akitsuutip 0,4 procentpointinik qaffanneratigut inissinneqassasoq. Tamatumunnga GE-p oqaatigaa, iluanaarutit ullumikkumut sanilliullugit qaffasinnerussasut naatsorsuutigineqarsinnaasut, taamaattumillu pisariaqanngitsoq naammaginaranilu raajanik qaleralinnillu avataasiorluni aalisarnermi akitsuutinik qaffaanissaq.

GE-p oqaatigaa, tamatumunnga siuninnerusukkutut poortuutissanut ilanngaasiisoqarsinnaanngitsoq, tamannalu inuussutissarsiornermut aningaasartuutaanerunissaanik inerreqartoq.

Raajanut akitsuutit pillugit Inatsisartut inatsisaanni, poortuutissanut aningaasartuutit akitsuutit tunngaviannit peerneqarsinnaapput. Inatsisartut inatsisaat taanna 1. januar 2018 aallarnertigalugu atorunnaarsinneqarpoq, Kalaallit Nunaanni aalisarnermi pisarineqartut isumalluutinik atuinermut akitsuutaat pillugit Inatsisartut inatsisaata atulersinneratigut. Nalinginnaasumik aalisarnermi akitsuusersueriaatsip eqqunneqarneranut ineriartortinneqarneranullu atatillugu, ilusiliap pisariillisarneqarnissaanut assigiissarneqarnissaanullu kissaateqarnikkut akitsuusersuinermi tunngavimmi poortuutissanut aningaasartuutit ilanngaatigineqarnissaat pisariaqartissorineqanngilaq.

GE-p oqaatigaa, ilanngullugu siunnersuummi § 4, imm. 1-imut; ”Matumani anguniagaasimavoq iluaqutissat suliarereerneqarnissaanut suliffeqarfinnillu pilersitsiniarluni piumassuseqalersitsiniarluni aaqqissuussinermik eqqussinissaq, inuussutissarsiummulli, taamaasillunilu inuiaqatigiinni aningaasaqarnermut akip qaffasinnerpaap ujartorneqarnissaanut periarfissaq pineqassaaq. Assersuutigalugu qaleralik ilivitoq 0,5-1,4 kg.-iuvoq. Assersuutigalugu J-cut nioqutissaq piariigaavoq. Soorunami aalisagaq assigiinngitsunik suliarineqarsinnaavoq, kisiannili pingaarnepaavoq niuerfiup pisisartullu piumasaqaataasa naammassinissaat. Piumassuseqalersitsinissamik aaqqissuussinermik eqqussineq, iluaqutissat, avammut tunineqannginneranni imaluunniit tunineqannginneranni suliarereerneqarnissaanut pissutissiisoq, inuussutissarsiornermi taamaasillunilu inuiaqatigiit aningaasaqarneranni akimik qaffasinnerpaamik ujartorneqarnissaanut periarfissiivoq.”

Siunnersuummik siunertaavoq, inuussutissarsiorfiup iluaqutissap suliarereernissaanut piumassuseqalertinnissaa, aalisakkap suliarereerneqanngitsup avammut tuniinnartarneranit.

Ilusilialli allanngortinngilaa, inuussutissarsiorfiup siullermitut pisisartut piimasaat naapertorlugit tulluussartariaqarnerat, pisullu ilaani tunisassianik nalikitsunik tunisassiormi aningaasartuutit isertitanit qaffasinnerusarsinnaanerat ilisimasariaqarpaat.

GE-p eqqumiigaa, qalerallinut sinerissap qanittuani pisarineqartunut akitsuut 1 procentpointinik apparneqarnera. GE-p akissutiserusuppaa, eqimattat taakkorpiaat sooq akitsuutitigut appaavigineqassanersut, tamatumunngalu uppernarsaasoqarnissaanik ujartuilluni.

Qaleralinnut sinerissap qanittuani aalisarneqartunut akitsuutip 1 procentpointimik apparneqarneranut tunngaviuvoq, sinerissap qanittuani aalisartut angallatitut tunisassiortutut, pisat suliarereernerisigut naliisa annertusinissaanut periarfissaqanngimmata.

Naggataagut GE-p oqaatigaa, tamanna, avataasiorluni aalisarneq pineqartillugu, qaffasissuseq ullumikkut ilisimaneqartoq ukiorpassuarni anguniarneqarsimasoq. Naatsorsuutit pillugit paasissutissanut, nukimmik atuineq pillugu paasissutissanut il.il. piimasaqaatit qaffanneqarnerat GE-p apeqquserpaa, tamanna GE-p isumaani inuussutissarsiorfiup sinneranut atuuttunit annertunerujussuummat – apeqquserlugulu, aalisarnermik inuussutissarsiornerup suna siunertarivinneraa? Matuma ataani nunatta karsiata aningaasartuutaasa matussusermissai taamaallaat siunertaanersoq?

Siunertaanngilaq, aalisarnermik suliasaqarfiup iluani inuussutissarsiutip ineriartortinnissaa ajornarlissassallugu. Siunnersuummik siunertaavoq iluaqutissat akitsuusernerisigut aalisarnermit pisuussutinit iluanaarutit ilaanik, inuiaqatigiit ataatsimut aalisarnermi iluaqutissaanik atuinermik atuisinnaanermillu inuiaqatigiinnut tunniussinissap qulakkeernissaa.

KNAPK

KNAPK-p aallaqqaasiutigalugu oqaatigaa, aalisarneq ingerlalluartsuussasoq aningaasaqarnikkullu nammassilluartsuussasoq, aamma akitsuusiisarnerup ataaniikkaluarluniluunniit. KNAPK-taaq qinnutigaa, ataatsimut aningaasartuutinik naatsorsuinermi kattuffiup ilanngunneqartarnissaa, qinnutigalugulu, Naalakkersuisut allaffeqarfiullu siunissami nalunaarsortassagaat.

Naalakkersuisut siunissami aalisagaqatigiiaanik iluaqutissanik atuinermut atatillugu aningaasartuutit annertussusaannik naatsorsuinermit aalajangersaanermullu atatillugu kattuffik ilaatinniartassavaat.

KNAPK akerliliissutissaqanngilaq, saattussat (snekrabbe) aamma uiluiit akitsuusersorneqannginnissaannut. KNAPK-p oqaatigaa, kikkut tamarmik soqutigisarissagaat, Kalaallit Nunaannit uiluiit Kalaallit Nunaannit tunisassianut ilaanissaat. Saattussat aamma

akitsuusersorneqannginneri, KNAPK-p pitsaasutut isigaa, ukiunilu makkunani akit iluanaarnartuunerannut innersuussilluni, tamannalu, ukiuni kingullerni angallatinik nutaanik imaqluarsinnaasunik aningaasaliisarnerup saniatigut, aalisarnerup pitsaasumik aallartinnissaanut tunngavissaqalerneramik isumaqartoq.

KNAPK-p ilanngullugu oqaatigaa, Naatsorsueqqissaartarfimmit akinut paasissutissat atorneqarnerinut innersuilluni, KNAPK innersusserusuppoq, nakkutilliisut eqqumaffigeqqissaassagaat, avammut niuertut akit suut atortarneraat, akiliussigallarnermi aki aalajangeraangamikku. KNAPK-p innersuuppaa, Kalaallit Nunaanni nioqqutissiorlut aalisakkerivinnillu piginnittut Kalaallit Nunaata avataani aamma nioqqutissiorfiuteqarmata, taamaattumillu piginneqatigiffiup pingaarnerusup taassumalu ingerlatseqatigiiffiutaata akornanni nuussinerni nammineq akiliussigallarnerup akia aalajangersinnaavaat. KNAPK-p taamaattumik innersuussutigaa, akiliussigallarnermi aki nakkutigineqassasoq, taanna norskit avammut tunisisartut nioqqutissamik taassuminnga EU-mut tunisineranni akimut qanittuussaaq.

Akilerartarnermut oqartussaasut tunisinermi akiligassanit paasissutissat umiarsuaatilinnit nalunaarutigineqartut avammut tunisinermi agguaqatigiissillugu akip naatsorsornerani atortarpai, tamatuma akitsuutit procentia aalajangertarpaa. Akilerartarnermut oqartussaasut tamanna pissutissaqarsorippassuk, Akilerartarnermut Aqutsisoqarfik akitsuutinut tunngaviusunik ilanngussanik nakkutilliinissamut periarfissaqarpoq, nalinginnaasumik akilerartarnermut inatsit naapertorlugu.

KNAPK-ttaaq ilanngullugu oqaatigaa, aki 8,00 kr.-iuppat qaffasinneruppalluunniit 5 procentianik aalajangersimasumik akitsuut, appasippallaartoq. Matumani aalajangersakkami § 7, imm. 1-imut innersuussisoqarpoq. KNAPK isumaqarpoq, aki 10,00 kr.-iuppat qaffasinneruppalluunniit akitsuut aatsaat aallartissasoq. Taamaattumik matumunnga tunngaviuvoq, aalisakkat akikitsut misilittakkat naapertorlugit imminnut akilersinnaatinnissaat ajornarnerusarmat. KNAPK-p innersuussutigaa, sinerissap qanittuani raajanik aalisartut ataatsimeersuarnermi aalajangersumik oqaatigeqqammeraat, akitsuutit aatsaat atuutilertariaqartut, tunisinermi akip 10,00 kr.-i qaangerpagu.

Naalackersuisut, inuussutissarsiummi akilersinnaassutsimik misissuinerup kingorna nalilerpaat, aalisarneq maannakkut akitsuummik, akimit 8,00 kr.-imit aallartittumik nammataqarsinnaasoq.

Aalisarnerup iluani ineriartorneq aamma akitsuutip kingunerisai Naalackersuisut malinnaavigeqqissaassavaat, tamatumunngalu atatillugu ingerlaavartumik nalilertassallugu akitsuutit annertussusaannik il.il. allannguinnissamut pisariaqartitsineq.

Akitsuutit killissaasa qaffanneqarnissaanut KNAPK-p akerliliissutigingilaa, tamanna 17,9 procentimut qaffanneqassasoq siunnersuutigineqarpoq. KNAPK isumaqarpoq, suliffeqarfiit avammut niueruteqartartut 0,4 procentimik qaffaavigineqarneq nammassinnaagaat.

KNAPK-li isumaqarpoq, sinerissap qanittuani qaleralinniarnermi akitsuutip 1 procentimik apparneqarnera annikippallaartoq, akitsuutillu 2 procentimik apparneqarnissaa siunnersuutigalugu.

Naalackersuisut, inuussutissarsiummi akilersinnaassutsimik misissuinerup kingorna nalilerpaat, aalisarnerup akitsuut 4 pct.-iusoq nammassinnaagaa.

Aalisarnerup iluani ineriartorneq aamma akitsuutip kingunerisai Naalackersuisut malinnaavigeqqissaassavaat, tamatumunngalu atatillugu ingerlaavartumik nalilertassallugu akitsuutit annertussusaannik il.il. allannguinnissamut pisariaqartitsineq.

Naggataagut KNAPK-p isornartorsiorpaa, aalisartut kattuffiata SQAPK-p siunnersuut tusarniaatit tigusimangimmagu. Kikkunnik tamanik ilaatitsinerup kattuffiit pissusaat isumaallu eqqornerusumik takutinneqarsinnaassapput.

Ajuusaarnarpoq, SQAPK-p siunnersuut tusarniaatit tigusimangimmagu. Siunnersuulli tusarniaanermi piffissaq tamaat tusarniaavimmi tigoriaannaasimavoq.

Siunissami Naalackersuisut SQAPK tusarniaavigisartakkatut ilannguttalissavaa.

Kommune Kujalleq

Kommune Kujalleq aallaqqaasiutit nalinginnaasumik oqaaseqaatinut, kommunip siunnersuummut siullermut oqaaseqaataanut innersuussivoq, tamatumunngalu oqaatigalugu, siunnersuutip kommunimi aalisarnermik inuussutissarsiornermut sunniutai Kommune Kujalliup nalilersinnaasimangikkai, akitsuutitigut allannguutit siunnersuutigineqartunit nunap immikkoortuani sunniutai inatsisissatut siunnersuummi matumani takuneqarsinnaangimmata.

Tamanna tunngavigalugu kommunip aalajangiusimavaa, aalisarnermik suliassaqarfimmi, kommunimi inuussutissarsiorfimmu annertuumik sunniuteqartumi, akitsuutitigut allannguinerit, inatsisissatut siunnersuutip politikikkut suliarineqarneranut atatillugu sapinngisamik pitsaanerpaamik misissorneqartariaqartut nassuiarneqartariaqartullu. Kommunilli tapersorsinnaavai akitsuutitigut suliniutit, suliffeqarnermut pitsaasumik sunniuteqarnissaanik siunertaqartut.

Kommunini tamani immikkut, inatsimmut nassuiaammi allannguutit siunnersuutigineqartut nunami immikkoortunut sunniutissai pillugit missingiutinik eqqornerusunik suliaqartoqarnissaanik Kommune Kujalliup kissaataa paasinarpoq. Tamannali naatsorsuineq annertoorujussuuvoq, taamaattumillu maanna suleriuseq malillugu siunnersuummi

taamaallaat ilaapput Kalaallit Nunaanni tamarmi aalisarnermut ataatsimut sunniutissamut naatsorsuutit.

Kommuneqarfik Sermersooq

Kommuneqarfik Sermersuup (KS) immikkut oqaatigaa, akitsuusersueriaaseq ima allanngortinneqassasoq, nioqqutissat suliareriikkat tunineri 'aalisagaq ilivitsoq'-tut naatsorsorneqassasut, taamaasilluni aalisakkap nalingan piviusumik takuneqarsinnaanngorniassammat. KS-ittaaq ilanngullugu oqaatigaa, allannguut aamma isumaqartoq, aalisagaqatigiit ilaat pineqartillugit pissutsillu ilaanni, aalisakkap nunami allami suliarineqaaqaartarnissaa imminut akilersinnaajunnaarnissaanik.

KS-ittaaq pitsaasutut isigaa, avataasiorluni saattussanik uiluinnillu aalisarneq akitsuusersorneqassanngitsoq. KS isumaqatigaa, siunnersuummut nassuiaatini ersertutut, allanut sanilliullugu killilimmik aalisarnerup siunissami akitsuusersorneqarnissaa siunertamut tulluutinngitsoq.

KS naggataagut isumaqarpoq, siunnersuutip innuttaasunut aningaasaqarnikkut sunniutissat annertunerusumik pitsaasuusut. KS-ip naatsorsuutigaa, akissarsiat qaffannerat aalisartut ataasiakkaat aningaasat atoriaannaasaannut pisissutigisinnaasaannullu sunniuteqassasoq, taamaasillunilu aningaasaqarnermut immikkut sulii pitsaasunik sunniuteqarlutik.

Akilerartarnermut Aqutsisoqarfik

Akilerartarnermut Aqutsisoqarfiup isumaqarpoq siunnersuut pitsaasuusooq, oqaatigalugulu siunnersuutip maanna inatsimmi atuuttumi nalorninartut arlallit peerai.

Inatsisissatut siunnersuutip atuutilernissaa pillugu Akilerartarnermut Aqutsisoqarfiup oqaatigaa, 2019-imi kvartalimi siullermi tullianilu akitsuutit 2018-imi kvartalit pingajuanni sisamaannilu akit anguneqartunik tunngaveqassasut. Tamatuma imaraa, akitsuutit annertussusai annertussutsit tunineqartut/tunitsivimmuut tunineqartut tunngavigalugit aalajangersarneqartarmata, annertussutsit 'aalisakkamut ilivitsumut' naatsorsorneqanngitsut. Maanna inatsisit atuuttut umiarsuaatilinnut piumasaqartitsisinnaanngimmata annertussutsit naatsorsorneqartut nalunaarsornissaannut.

Akilerartarnermut Aqutsisoqarfiup oqaaseqaataa siunnersuummi atuutilersitsinissa ut aalajangersakkami inatsisissatut siunnersuummut nassuiaammutr ilanngunneqarpoq.

Inatsisissatut siunnersuummi nr. 3 aamma 5-imi Kalaallit Nunaanni nunami tunitsivinnut tunisineq aamma tunisassiorneq pillugu malittarisassanik atuuttunik erseqqissaasoqarnissaa siunnersuutigineqarpoq. Akilerartarnermut Aqutsisoqarfiup siunnersuutigaa, erseqqissaanerit taakku aamma inatsimmi atuuttumi § 5, imm. 2-mi kiisalu § 11, imm. 1-imi atuutsinneqalissasut.

Siunnersuut ilanngunneqarpoq

Akileraartarnermut Aqutsisoqarfiutaaq siunnersuutigaa, § 6, imm. 4 maanna atuuttoq, ima allanngortinneqassasoq, Akileraartarnermut oqartussaasut siunissami taamaallaat avataasiorluni aalisarnermut akitsuutit procentii saqqummiuttalissagaat, ullumikkumut sanilliullugu, agguaqatigiissillugu tunisinermi akit aamma akitsuutit procentii saqqummiunneqartarnissaannit.

Siunnersuut ilanngunneqarpoq

Akileraartarnermut Aqutsisoqarfiup oqaatigaa, inatsit atuuttoq pisuni, ataasiinnarmik imaluunniit ikitsuinnarnik avammut tunisisartoqarnerani, siunertarinngisamik unammillertinut akinik paasissutissiisinaaneri. Siunnersuummi nr. 7 naapertorlugu, uppersaatinik nassiussinissamut piumasaqaatip atorunnaarsinneqarnerani, § 13, imm. 3, ikerinnaasiorluni aalisarneq pineqarluni, allanngortinneqartariaqartoq.

Siunnersuut ilanngunneqarpoq.

Akileraartarnermut Aqutsisoqarfiup oqaatigaa, 'uiluiit' siunnersuummi nassuiaatini nr. 2-mit peerneqartariaqartoq, taakku ilaatinneqarunnaarmata.

Siunnersuut ilanngunneqarpoq.

Naggataagut Akileraartarnermut Aqutsisoqarfiup siunnersuutigaa, nalunaarsuinissamut aamma akitsuutinut akiliutit minnerpaaffissatut killiliussamik inatsisissatut siunnersuummi aalajangersakkamik ilanngussisoqassasoq. Akileraartarnermut Aqutsisoqarfiup siunnersuutigaa, akitsuutinut akiliutit aalisagaqatigiiaanut kvartalimut 100 kr.-it ataappagit nalunaarutigineqartassanngitsut imaluunniit akilerneqartassanngitsut. Tamatuma umiarsuaatileqatigiinni/tunitsivinni aamma qitiusumik allattoqarfimmi allaffissornermik annikillisaassaaq.

Siunnersuut ilanngunneqarpoq.

Avannaata Kommunia, Peqqissutsimut Ilisimatusarnermullu Naalackersuisoqarfik, Naalackersuisut Siulittaasuata Naalackersuisoqarfia aamma Isumaginninnermut Inatsisinillu Atuutsitsinermit Naalackersuisoqarfik siunnersuummut oqaaseqaateqanngillat.

Aalajangersakkanut ataasiakkaanut nassuiaatit

§ 1-imut

Nr. 1-imut (§ 3, imm. 1)

Siunnersuutip nassatarisaanik avataani saattuarniarnermi uiluinniarnernilu akitsuusersuisoqarunnaassaaq.

Saattuat uiluillu tamatuma kingorna aalajangersakkami § 3, imm. 4-mi ilaatinneqassapput, taanna malillugu akitsuut kiilumut ataatsimut 0 kr.-iussalluni.

Nr. 2-mut (§ 4, imm. 1)

Periutsimi akitsuutitigit tunngavigineqartoq aalajangersakkakut allanngortinneqarpoq.

Siusinnerusukkut atuuttut assigalugit aalisagaqatigiit tunineranni akiat tunngavigalugu akitsuusiisoqartassaaq. Tunisinermi aki tassaavoq aki pisisumit tunisisumillu isumaqatigiissutaasoq tunisinermi, assartuinermi il.il. aningaasartuutit ilanngaatinagit.

Siusinnerusumullu sanilliullugu siunnersuutigineqarpoq aalisagaqatigiinnit ataatsinit kaaviiartitat tamarmiusut malillugit agguataarisooqartassasoq, aalisakkalli tunineqartut kiilumut (naammassillugit suliarineqartut) annertussusiat malinnagu aalisakkat pisarineqartut ('aalisagaq ilivitsuutillugu') kiilumut ataatsimut nalingat malinneqassalluni.

"Aalisagaq ilivitsoq" paasineqassaaq pisat ilaasa nalunaarutigineqarnerini naatsorsueriaatsit, pisat ilaasa nalunaarutigineqarnerini naatsorsueriaatsit pillugit Namminersorlutik Oqartussat nalunaarutaat nr. 5, 22. marts 2012-imeersoq maanna atuuttoq naapertorlugu naatsorsorneqartut aalisakkap uumanermini oqimaassusiatut naatsorsorneqartoq.

Assersuutigalugu saarullinnut saaniiakkanut (amiikkat saaniiakkallu) kiilumut ataatsimut pisassiissutinit ilanngaattissaat 3,25-mik naatsorsueqqinnikkut naatsorsorneqassaaq. Tamatuma kingorna pisassiissutinit ilanngaatigineqartussaq aalisakkanut ilivitsunut 3,25 kiiluussaaq, annertussuserlu tamanna akitsuutip procentiata naatsorsorneqarnerani atorneqassalluni.

Uiluinniarnermi raajarniarnermilu aalajangersagaq aamma atuutissaaq.

Nr. 3-mut (§ 4, imm. 3)

Tunisinermi agguaqatigiissillugu akigititat naatsorsorneqarnissaanni Nunatsinni Naatsorsueqqissaartarfimmit paasissutissat atorneqartarnissaat Inatsisartut inatsisaanni erseqqissaatigineqassasoq siunnersuutigineqarpoq.

Nr. 4-mut. (§ 5, imm. 2)

Inatsisip oqaasertaani ersarissarneqassasoq siunnersuutigineqarpoq, § 5, imm. 2 naapertorlugu akitsuut, taamaallaat annertussutsimut, suliareqqaarneqarnissaat/suliarineqarnissaat siunertaralugit tunitsivimmut imaluunniit nioqqutissiorfimmuut tunineqartut taamaallaat atuutsinneqartassasut.

Tunitsivimmut imaluunniit nioqqutissiorfimmuut tunineqareernerata kingorna, pisat suliareqqaarneqaratik avammuut tunineqarpata, akitsuut pisat allamut tunniunneqartarnerat aamma Kalaallit Nunaannit anninneqartarnerat pillugu Inatsisartut inatsisaani aalajangersakkamut atuutsinneqartassasut.

Nr. 5-imut (§ 6, imm. 3)

Siunnersuutigineqarpoq akitsuummut killigititaq 17, 5 procentimiit 17,9 procentimut qaffanneqassasoq.

Nr. 6-imut (§ 6, imm. 4)

Siunnersuutigineqarpoq, Akileraartarnermut oqartussaasut siunissami taamaallaat avataasiorluni aalisarnermut akitsuutit procentii saqqummiuttalissagaat, ullumikkumut sanilliullugu, agguaqatigiissillugu tunisinermi akit aamma akitsuutit procentii saqqummiunneqartarnissaannit.

Nr.7-imut (§7, imm. 1)

§ 7 naapertorlugu akitsuuteqartitsinissami aalisakkat suliarineqarnissaat/suliareqqinneqarnissaat siunertaralugu tunitsivimmut tunisassiorfimmulluunniit tunineqartut annertussusiat malillugu taamaallaat akitsuuteqartitsisoqarnissaa inatsisip oqaasertaani erseqqissaatigineqassasoq siunnersuutigineqarpoq.

Tunitsivimmut tunisassiorfimmulluunniit tulaassinerup kingorna pisat suliareqqaarneqaratik avammuut tunineqarpata allamut tunisineq imaluunniit Kalaallit Nunaata avataanut tunisineq pillugu inatsimmi aalajangersakkat naapertorlugit akitsuusiisoqassaaq.

Aammattaaq Kalaallit Nunaanni tunitsivimmut tunisassiorfimmulluunniit tunisineq pineqartoq inatsisip oqaasertaani erseqqissaatigineqarpoq.

Nr. 8-mut (§ 7, imm. 4)

Siunnersuutigineqarpoq qaleralinnik tunisinermi, sinerissap qanittuani aalisarneqartut, akitsuut akiusup 5 procentianit akitsuut akiusup 4 procentianut appartinneqarnissaa.

Tunisinerni allani allannguut sunniuteqassanngilaq.

Aalajangersagaasimasumi imm. 4-mi uiluinnik tunniussinermut imaluunniit anninneqarfiannut tunngasut atorunnaassapput siunnersuutip allannguutaa § 3, imm. 1-i tunngavigalugu.

Nr. 9-mut (§ 11, imm. 1)

Inatsisip oqaasertaani ersarissarneqassasoq siunnersuutigineqarpoq, aalajangersakkami pineqartoq suliareqqaarneqarnissaat/suliarineqarnissaat siunertaralugu Kalaallit Nunaanni tunitsivinnut imaluunniit nioqqutissiorfinnut tunineqartut.

Nr. 10-imut (§12, imm. 2)

Nalunaarutiginninnermini uppernarsaatit assilinerinik nalunaarutigisaqarnermi ilanngussaqaartussaataaneq il.il. piunasaqaataajunnaassasoq siunnersuutip kingunerissavaa.

Siunnersuutigineqarpoq, minnerpaaffissamik eqqussisoqassasoq, akitsuutitut akiliutit aalisagaqatigiiaanut piffissami akitsuusersuiffimmi 100 kr.-it ataappagit nalunaarutigineqartassanngitsut imaluunniit akilerneqartassanngitsut. Aalisagaqatigiinnut ataatsimut akitsuutit naatsorsorneqartut kvartalimi 100 kr.-it ataappagit, akitsuuserneqassanngillat imaluunniit nalunaarutigineqassanngillat.

Nr. 11-imut (§ 13, imm. 3)

Siunnersuutip imaraa, piunasaqaataajunnaartoq, nalunaarnermut atatillugu uppernarsaatinik il.il. nalunaarummut tunngaviusut assinginik ilanngusisoqartarnissaa.

Siunnersuutigineqarpoq, minnerpaaffissamik eqqussisoqassasoq, akitsuutitut akiliutit aalisagaqatigiinnut piffissami akitsuusersuiffimmi 100 kr.-it ataappagit nalunaarutigineqartassanngitsut imaluunniit akilerneqartassanngitsut. Aalisagaqatigiinnut ataatsimut akitsuutit naatsorsorneqartut kvartalimi 100 kr.-it ataappagit, akitsuuserneqassanngillat imaluunniit nalunaarutigineqassanngillat.

Nr. 12-imut (§ 17, imm. 1)

§ 17, imm. 1, Inatsisartut inatsisaanni atuuttumi ilaatigut Inatsisartut inatsisaanni § 12, imm. 2-mik piaaraluni imaluunniit mianersuaalliorujussuarluni unioqqutitsineq kinguneqartitsisinnaavoq.

§ 12, imm. 2 atuuttoq, pisussaaffiliinermik aalajangersaavoq, inatsisissatut siunnersuummi § 1, nr. 10-mik atorunnaarsinneqartoq.

Taamaattumik § 17, imm. 1-imi, kinguneqartitsisinnaanermut tunngavissami § 12, imm. 2 pineqartillugu atortiinnassallugu tunngavissaqanngilaq.

Taamaattumik siunnersuutigineqarpoq, § 12, imm. 2-mut innersuussineq, Inatsisartut inatsisaanni § 17, imm. 1-imit peerneqassasoq.

§ 2-mut

Inatsisartut inatsisaat ulloq 1. januar 2019-imi atuutilersussatut aammalu aalisakkanut ulloq 1. januar 2019-imi kingusinnerusukkulluunniit pisinineqartunut atuuttussatut siunnersuutigineqarpoq.

Siunnersuutigineqarpoq, 2019-imi kvartalimi siullermi tullianilu akitsuutit 2018-imi kvartalit pingajuanni sisamaannilu akit anguneqartunik tunngaveqassasut. 2019-imi kvartalimi siullermi tullianilu akitsuutit procentiat, ullumikkut aalajangersaasarnertut aalajangersarneqassaaq, tamanna isumaqarpoq kvartalimut siullermut tullianullu akitsuut qaffasinnerussasq kingorna aalisakkat suliareqqaarneqareertut 'aalisakkamut ilivitsumut' naatsorsorneqareerpata akitsuutip procentianit.